

Gaxgonq, miz doiq songseng ndeu, gyoengqde beizheiq ndei, gvaigvetvet, ndangcangq. Hoeng, ranz gyoengqde hoj lai, ciengzseiz donq iek donq imq. Daeggo mbouj gyaenz aen ranz hoj, cix muengh ndwenngoengz boux miz ngaenz. Daegnuengx yienznaeuz hix muengh ndwenngoengz boux miz ngaenz, hoeng de mbouj dwgcaengz aen ranz hoj, cix dwg naemj yungh hag bae gajbienq minghyinh.

Daeggo dauqdaej nyaenx mbouj ndaej cungj ndwenngoengz neix, gaen baengzyoux de bae baihgrog, vih ra ndaej ngaenz lai, byaij hwnj diuzroen famhcoih lo. Daeggo ra ndaej ngaenz lailai, hix fak di ngaenz dauq ranz hawj daxboh daxmeh, ok ngaenz hawj daegnuengx doegsaw. Daxboh daxmeh laihnaeuz daeggo youq baihgrog ra ndaej faenh hong ndaej ngaenz lai ndeu, couh ansim gvaq ndwenngoengz lo.

Miz baez ndeu, mwh daeggo guhcaeg, miz vunz bauqgingj le, gingjaz gig vaiq gaemh ndaej daeggo. Daeggo haeuj lauz naengh lo, couhcinj de ienqhoij gij saeh bonjfaenh guh raixcaix, cix mbouj gajbienq ndaej gijmaz, aenvih de

deng buenq dai. Aen simmuengh ceiq laeng de dwg dauqranz, yawjyawj bohmeih. Daegnuengx rox le daeuj yawj daeggo, daeggo doiq daegnuengx naeuz: “Nuengx ha, mwngz bang gou naengh lauz geij ngoenz, gou dauqbae yawjyawj bohmeih, 3 ngoenz le gou itdingh dauqdaej.”

Daegnuengx ngaek gyaenj ei lo, de doq ra gouz bouxdawzlauz, hawj bonjfaenh lawh daeggo naengh lauz.

Seizhaenx faplwd hawj bouxwnq lawh bouxfamh naengh lauz ndaej, hoeng danghnaeuz hengzgingz ngoenz haenx bouxfamh mbouj daeuj, boux lawh naengh couh aeu lawh bouxfamh souhdai.

Bouxdawzlauz ei hawj gyoengqde doxlawh.

3 ngoenz seizgan couh lumj duzloeg buetfofo nei. Goj buet goj buet couh mbouj raen ngaenz lo. Hengzhingz ngoenzhaenx fwn hung rumz

hung, fagfouj seizseiz yaek doek roengz gyaenjhoz daegnuengx bae, sojmiz vunz youq ciengz cungj vih daegnuengx heuh mbouj goengbingz. Daegnuengx cix naeuz: “Gou nyienh vih daeggo bae dai!” Seizneix, daeggo rongx gyoengqde buet gvaqdaej, mbeilaux byaij coh daizraemjgyaeuj, vuenh daegnuengx roengzdaej.

(Gveigangj Si Gangjbwz Gih Ginhhang Siujyoz roek nienzgaep Cuh Yungjangh)

Suenbyaek Yahdaiq

姥姥家的菜园

Ndaw sujgyaj, gou bae ranz yahdaiq. Ranz daiq miz aen suenbyaek ndeu, gizde hix dwg aen suen' angq gou.

Suenbyaek ranz daiq dwg gizdieg hoenghfwdfwd ndeu. Henz led baihgrog ndwn baenz baiz baenz baiz haeuxyangz, lumj baenz lied baenz lied bouxbing. Henz aen suenbyaek, baenz aen baenz aen lwgmanh dingjmbwn nding'yanyan ndaengndiengq daengj soh aendang de, lumj dwg naeuz: “Hw! Gou dwg bouxvuengz lwgmanh bw, mbouj saenq mwngz cimzcimz yawj!” Goraz sohswdswd saenzheiq dwk ndwn youq henz led baihsae, gyoengqde yienznaeuz byom iq, hoeng cix cingsaenz gvaekgvaek. Lwgfaeg caeuj lwggva aende gig hung, mbei cix gig iq, gyoengqde ndoj youq laj mbaw hung, haha, dwg lau lij caengz baenzgeq couh deng gwn luba? Baenz go baenz go lwggve banqraih youq gwnz led baihnanz, ngoenznaengz goengda cungj mbaet geij aen lwggve heuh yahdaiq cau j hawj gou gwn, lwggve

haeuj bak raeuzrwdrd, homfwdfwd, ndei gwn raixcaix. Henz gaeu lwggve dwg benq goduh ndeu, lwg faekduh ndoj youq ndaw gyoivenj meh faekduh caenfwnz guh haenx, cingq ninzfofo ne! Coenggep heusausau, makyungz nding'yanyan, lwgbiengz heuoiq, lwggwz gyaemqgwit ciuq gonqlaeng baizdoih, maj ndaej hoenghwdhwd. Baihbaek suenbyaek dwg aen daemz ndeu, aenngaeux hauoiq cingq youq laj naezngawh haenqrengz majhung ne!

Doenghduz iq hix gyaenz aen suenbyaek neix bw! Gyanghaet, saehaexma youq gwnz mbawbyaek dumzdwddwd raih bae raih dauq, dwg mbouj dwg cingq lienhdang ne? Daengz banhaemh, daekdaeq caeuj duzgoep couh ciengq hwnj go angqyangz.

Ma daengz ndaw singz, gou engq siengjniemh aen suenbyaek yahdaiq lo. Binaj sujgyaj, gou lij yaek bae yawj gyoengq baengzyoux ndaw suenbyaek.

(Cezgyangh Swngj Dungzyangh Si Cunhhuieh Siujyoz sam nienzgaep Ya Lozsih)



Guh Vunz, Gaej Guh Gaeu

做人, 不要做藤

Cuengqhag naengh laedienh dauqranz, gou aemq daehsaw ing youq bangxlaeng laedienh. Doxboh raen le, yiemzsuk caeuj gou naeuz: “Seizbienth dieg lawz cungj ing dwg gij gvenq mbouj ndei. Mizmbangj aen laedienh bangxlaeng de dwg dou, hai ndaej, ing haeuj de bae ne yungyiemp raixcaix. Ndw ndwenngoengz lij miz haujlai doxgaiq mbouj lumj yawj hwnjbae baenzhaenx maenh, seizbienth ing hwnjbae yungyiemp raixcaix.”

Gaenlaeng daxboh youh gangj aen goj caen ndeu hawj gou: Miz boux lwgnyez ndeu ing youq gaiq lanz bakcanz, doeklaeng gaiq lanz soeng le, lwgnyez daj gwnz laeuz doek roengz bailhaj bae, mbouj miz mingh lo.

Dingq le daxboh gangj, gou lau raixcaix, caiq hix mbouj gamj luenh ing lo. Dauqngex gaxgonq, gou ciengzseiz naengh mbouj baenz naengh, ndwn mbouj baenz ndwn, mbouj dwg ing aen'eij, aencong, couhdwg ing bangxciengz, lien byaij roen hix gyaenz ing haeuj bouxwnq bae, caezgya cungj naeuz gou lumj “diuz gaeu ndeu”.

Ndaw govwnz raeuz hag miz coenz vah baenzneix: “Ndw lumj coengz, naengh lumj cung, byaij lumj rumz, ninz lumj gung.” Gou baezlaeng itdingh aeu haeujrwz gij yiengh bonjfaenh, guh boux vunz cingsaenz gvaekgvaek ndeu.

(Ngeih nienzgaep Bungz Yizcangh)